

Embaixadór Japaun Selebra Inaugurasaun ba Edifisiu Eskola EBCC Nossa Senhora Aitara iha Suku Manlala, Postu Administrativu Soibada, Munisípiu Manatuto.

2 Abril 2025

Iha loron 2 fulan Abril tinan 2025, Sr. Tetsuya KIMURA, Embaixadór Japaun, marka prezensa iha serimónia inaugurasaun edifisiu eskola foun iha eskola EBCC Nossa Senhora Aitara iha Suku Manlala, Postu Administrativu Soibada, Munisípiu Manatuto.

Serimónia ne'e organiza hosi Fundasaun Leobalu, ONG lokál ne'ebé mak implementa projetu ne'e. S.E. Presidente Ramos Horta, Luis Inacio Hendriques Fernandes, Presidente Autoridade Munisípiu Manatuto, ofisiál governu lokál hosi utoridade relevante sira, profesór no estudante sira hamutuk ho Embaixadór Kimura iha serimónia ne'e.

Embaixadór Kimura haktuir, *“Ha'u haksolok tebes hodi mai selebra inaugurasaun edifisiu eskola foun iha Munisípiu Manatuto hamutuk ho Sua Exelénsia Presidente Ramos-Horta no comunidade sira ne'ebé sei utiliza eskola ida-ne'e. Ha'u hein ho laran tomak katak eskola ida-ne'e sei sai fatin ba mehi no aspirasaun ba estudante sira, hodi fó kbiit ba sira atu foti sira nia pasu dahuluk ba sira nia futuru ne'ebé nabilan. Ami hein atu servisu hamutuk ho ita-boot sira hotu hodi apoia estudante sira no comunidade iha tinan hirak tuir mai”*.

Ba projetu ida ne'e, Governu Japaun fó USD \$ 92,590 liuhosi ninia eskema apoiu finanseiru ba Projetu Baze no Seguransa Umanu (GGP). Liuhosi projetu ne'e konstrui edifisiu eskola foun ho sala-de-aula tolu (3) no sala professor ida (1) ne'ebé fó benefisiu ba estudante na'in 102 no profesór na'in 13 iha eskola Nossa Senhora Aitara.

Dezde lansa projetu dahuluk iha tinan 2000, projetu hamutuk 141 mak implementa ona tuir eskema GGP nian iha munisípiu 13 hotu iha Timor-Leste. Projetu sira prinsipálmemente fó asisténsia ba infraestrutura komunitária, inklui konstrusaun no rehabilitasaun ba instalasaun eskolár sira, postu saúde sira, no Sistema abastesimentu bee mo'os, hodi hatán ba nesesidade umanu báziku oioin iha baze.

(Termina).